

Hunde, iwverall unn haufeweis

Om Ostermondaach hawwe mer moins vorm Friehschoppe uff de Bonk om Moo gesetze, de Karl, de Schorsch unn ich, unn hawwe bei dem scheene Wetter iwwers Wasser unn aach de Uferweech enuff unn ennunner geguckt. Die Sunn hott nit nor uns gewärmt unn deshalb warn schunn vill Mensche unnerwegs.

Uff oomol saacht de Karl: Vill Hunde gibt's in Flerschem! Unn de Schorsch druff: Vill große Hunde! Doo musst ich nodierlich aach mein Senf dezu gewwe: Iwverall unn haufeweis!

Unn dann hawwe merr widder iwwers Wasser unn de Weech enuff unn enunner geguckt.

Doo fengt de Karl widder oo: Dess sinn nit alles Flerschemer, die mett dene Hunde. Doo brauchdsde derr nor emol die Audonummern hier uff em Parkplatz oozegucke. Die kumme von iwverall her, sogar von Fronkfort, unn führn hier ihr Hunde aus. Weil merr halt vill Gras hawwe hier om Moo, unn weil de in Fronkfort seit e paar Woche enn Haufe Geld bezahle musst, wenn doin Hund irchendwohie – wie saacht merr? - no ja, hiekote dut unn du machst es nit eweg. Ich waaß nit, wasses in Fronkfort kost, awwer in Kassel, so habb ich gelese, doo kost en Hundehaufe uff de Stroos 35 Euro unn uff em Kinnerspillplatz 150 Euro. Enn Haufe Geld, moonder nit?

De Schorsch hott genickt: En Haufe Geld ferr so en Haufe. Unn oigedriwwe werds dort von de Hilfspoliziste. Ich glaab, doo det die Stadt gonz schee Geld mache, wenn dess emol aach hier dorchgesetzt det wernn.

Ich saach druff: Merr kennt joo enn Unnerschied mache zwische Flerschemer unn Fronkforter Hunde, unn weil merr se sunst nit außenonner halle kann, könnt merr dene Flerschemer Hunde joo e Schild mett em Flerschemer Wappe umhänge, mett dene drei große Eff druff.

De Karl hott mett em Kopp gewackelt: E Schild umhänge iss gut. Doo wisst merr, dass se nix ze bezahle brauche. Awwer warum mett dene drei große Eff? Was sollen dess haaße?

Ei, habb ich gegrinst, was dess haaße soll? Flerschemer Fleehbutz Frei! Awwer Spaß beiseit: Wennde in so en Haufe enoidappst isses egal, ob der von em Flerschemer odder von em Fronkforter Hund iss. Awwer es wär schunn gut ferr Auswärdiche ze wisse, dass ihr Hunde in Flerschem nit mache könne was wo onnerst vill Geld kost.

Dann hawwe merr widder de Weech enuff unn enunner geguckt. Unn doo sehn merr, wie so e stromm Weibsbild mett Mordspauer dooher walkt, unn e gonz Stick hinnenooch, gonz langsam unn schwerfällich, kimmt ihrn ahle, gritzegraue Hund. Die Fraa flitzt zu ihrn Audo, so em Dschiep mett F-Nummer, mecht hinne die Klapp uff, zieht e Brett mett so Querleiste wie ferr die Hinkel erraus unn

lockt: Komm, komm endlich, Alterchen, ich habe heute noch mehr zu tun!

Doo macht de Schorsch so e richdich schepp Schnut: Ihr Männer, ich werr aach alt. Genau desselbe, nor in echt Flerschemerisch, hott moi Kättche heit moin in aller Hergottsfrieh aach zu mir gesaacht.

Eiern Honnes